

CREMPA.



REMPA, Holsatiæ opidum, nomen habet à flumine nauigabili Crempa, quod per medium istius labitur in Storam & Albim. Ius municipale & insignia accepit, anno Domini 1271. à Gerharðo: primo Holsatiæ, Schovvenburgens. ac Stormariæ Comite Adolphi IIII. filio. Sub Christiano tertio anno Domini 1535. flagrante bello Lubecensi, vallo fossisque & propugnaculis à Ioanne Ranzouio, equite aurato, est ita munita, vt inter Holsatiæ munitiones, non minima existat. Incolæ mercaturam exercent, nec minus agriculturæ operam dant, cum in palustribus ac frugiferis locis, non procul ab Albi & Stora sita est. Nunc autem anno 1584. Friderico secundo Regi Daniæ, tanquam Duci Holsatiæ, ad quem à patre Christiano tertio deuoluta subiecta est.

An. Dom.
1271.

*Vrbs ego Cymbrica non infima gloria terræ,
Velifero Crempa flumine, Crempa vocor.
Quod simul in Storam resonans se iactat in Albim,
Me media cursu, præpete parte secans,*

Anno Do-
mini 1535.
sub Chri-
stiano III.

*Municipale meis, ius ac insignia cecidit
Ciuiibus Holsatiæ, Stormariæq. Comes.
A quarto celebris genitore Gebhardus Adolpho
Alter & istius, nominis ipse Comes.
Cum vallo fossas, & propugnacula struxit
Auratus summa laude vehendus eques.
Ianus Ranzouius, bello flagrante Lubeca
Munitam satis, vt dicere iure queas,
Rure mei viuunt ciues, ac merce, palustris
Quod cum fecundis & bene structa locis.
Porro Friderico iam sum subiecta secundo,
Qui Dania Rex, & Dux simul Holsatiæ est.*

REINHOLDSBURGA.



REINHOLDSBURGA, elegans Holsatiæ opidum, arce regia conspicuum, abs Rheinoldo quodam fundatum, qui nomen opido & Castro indidit Reinholdsborch, qui fundator, num princeps vel nobilis aliquis fuerit, ignoratur. Vrbs est opportuno loco sita; Eidora enim totam eam circumfluit, & aliquoties cursu suo diuidit, ita, vt inde nauigatio in Hispaniam, Galliam, Angliam ac inferiorem Germaniam institui queat. Turris, quæ hodierna die in arce conspicitur, à Gerharðo magno Comite Holsatiæ & Schovvenburgens. ædificata est, circa annum 1230. Deinceps, alter Gerhardus, Henricus & Nicolaus fratres, dederunt ciuitati aliquot pagos ac ius municipale, vnà cum insignibus, quibus hodierno die vitur, anno Domini 1339. Quorum successoribus mortuis, ad Reges Daniæ, ex Oldenburgens. comitum familia natos, venditione, cum cæteris Holsatiæ locis, peruenit. Christianus tertius Rex Daniæ eam muniti- onem, quæ iam videtur, fieri curauit. Ioannes eius frater, cui in diuisione obtigerat, arcem ibidem, vetustate collapsam, ædificijs splendidis rursus exornauit. Quo mortuo absque hæredibus, cum eius ditiones inter fratrem Adolphum & Fridericum II. fratris filium, iure feudali diuiderentur, Friderico II. Regi Daniæ cef- sit, cuius dominio hoc anno 1584. subiecta est.

*Vrbem quam spectas, hæc Reinholsburga vocatur,
Eidora est fluuius, qui prope voluit aquas.
Indidit huic vrbi nomen Reinholdus, & arci,
Danorum nunc Rex, hanc Fridericus habet.*